

Wšelake měnjenja wo zamołwitosći

Budyšin (SN/MiR). Wospjet dže w Serbach wo kompetencu. Tónkróć do diskusije zapřijate su iniciatiwna skupina Serbski sejm, Budyski regionalny zarjad Sakskeje kubłanskeje agentury (SBAB) a Domowina. Prašenje rěka, što je zamołwity za serbske kubłanske naležnosće. Člon iniciatiwy dr. Andreas Kluge praji: „Administratiwna organizacija serbskeho šulstwa je bjezwuwzačnje w zamołwitosći SBAB a nic Domowiny.“ Tole zwurazni wón pónđzeli tež w mejlce wosobinskemu referentej a zamołwitemu za serbske kubłanske naležnosće SBAB Bosćijej Handrikej. Kaž tón Andreasej Kluzej piše, „regionalny zarjad njehladajo na swoje wuprajenja radži, zo so iniciatorojo předewzača ‚Serbski sejm‘ přichodnje z prašenjemi najprjedy na legitimowane gremije serbskeho ludu wobroča“, z čimž měni Domowinu. To Handrik na naprašowanje SN hišće raz wobkrući.

Kluge bě Handrika dwaj dnjej do přenjeho kubłanskeho wjerška iniciatiwy 14. januara w Budyšinje wo informacije prosył. Dramatiska situacija, zastarać serbske a serbšćinu wuwučowace šule z wučerjemi, bě sejmikarjow k naprašowanju pohnuła. Zdobom poskići Kluge zarjadej SBAB podpěru, pytać za serbskimi resp. serbšćinu rěčacyimi přidružnikami. Džeń pozdžišo bě Bosćij Handrik wotmołwił, rozjimajo, kak SBAB při wobsadženju swobodnych wučerskich městnow postupuje. Po kubłanskim wjeršku sposrědkowa dr. Kluge zarjadej dalše prašenja. Chcyše na přikład wědžeć, kelko wučerjow serbšćiny je tuchwilu w zamołwitosći SBAB aktiwnych a kelko docpěje lětsa a přichodnje rentnarsku starobu. Tute informacije pak SBAB sejmej podała njeje. 17. februara zdžěli sobudžělačerka zarjada, zo je „partner SBAB w naležnosćach serbskeho ludu po rjadowanjach sakskeho Serbskeho zakonja Domowina jako zastupjerka zajimow a třěšny zwjazk serbskich towarstwow“.

Tež tole Bosćij Handrik na naprašowanje SN hišće raz wobkrući. Dr. Kluge je 20. februara w dalšej mejlce zarjadej znapřećiwił: „Z wida wobydlerja je jeničce SBAB legitimowany narěčenski partner nastupajo šulske prašenja.“ Zarjad Domowiny njeje na naprašowanje SN dotal, dowola sobudžělačerjow dla, wotmołwić móhl.